

## KARÁSIA

### Paoro Iokanatsopata Karásia Auakanimoni

<sup>1</sup> Nota Paoro iokanatsopata ia aãtsopa hĩtemoni. Nota Teoso iokanatakimoto kãkitimoni Teoso iokanapirena nisãpiretini ĩkapani. Kona kãkitini iokanatano nota. Xesosi Kristora iokanatano nota. Aĩri Teoso, Xesosi ipinaãka atoko õkitikakarira, iura iokanatano nota kãkitimoni. <sup>2</sup> Ikinika aĩtariakori notakata auakani, nota apaka xinikanãtai hĩte. Hĩte ikini aikoti Teoso misãkiretikoãtaã apotiitakaniua Karásia tixini auakani axinikanãtapika.

<sup>3</sup> Aĩri Teoso, Xesosi Kristo aãũte pakini sikari ikinipoko erekari hĩtemoni. Ninoa kamaerekaxiniretai hĩte.

<sup>4</sup> Xesosi ipina amaerekani imaktxakini ĩkapani. ! Erekari uatxa auakani. Maerekati kamakani sauaki aãuakasaaki, Xesosi ipina ate imaktxakini ĩkapani, amapinakani ĩkapani. Xesosi ipĩpe ate ĩkapani, kotxi aĩri Teoso nirekari Xesosi ipinini ate maerekani imaktxakini ĩkapani. <sup>5</sup> Ikiniõtika: “Peerekai,” matxari Teoso. Aĩtipirika kãkiti txapikari Teoso: “Peerekai.” Ameẽ.

#### *Ãti Iokanapirena Erekari !Auari*

<sup>6</sup> Nikenakopiretari Teoso hĩtakanapaãpotini. Iuasaaki nitsorĩkaãnãta. Kinirepa hĩtakanapari Teoso sãkire? Kotxi mapa kasiritinoka hĩte auikari Teoso iokanapirena erekari. Kristo iteene tiretai hĩte, ininiã akiritai hĩte inakitiakori hininiua ĩkapani. Kinirepa hãuikatari aĩti iokanapirena? <sup>7</sup> Atão nisãpiretai hĩte. Aĩti iokanapirena erekari !auari. Nikenakopiretari kãkiti hĩte oereẽkani. Ninoa nirekari ikoketinirina isãkirena Kristo iokanapirenakata. Uatxa !himarotaikari atão sãpirenatxi.

<sup>8</sup> Atão asãpiretapekai Teoso iokanapirena erekari. Ātião sãkiretxiti asãpiretiniã, Teoso iokanataua ate kãkiti misiritikomoni, ātipirika misirikaretxi auiniãtaã. Teoso nitiri iaxitikiri apaka sãpiretiniã Ātião iokanapirenatxi, Teoso iokanatari iua initiri imisiritikomoni ātipirika misirikaretxi auiniãtaã. <sup>9</sup> Hīte auikapekari Teoso iokanapirena erekari. Ātião iokanapirenatxi sãpiretakari sãpiretiniã Teoso iokanapirena atão minakati, iokanataãkako imisiritikomoni ātipirika misirikaretxi auiniãtaã. Asãpiretapekai ikara inakari sãkiretxiti. Uatxa iuaĩkana nisãpiretai.

<sup>10</sup> Ikara atoko nitxai hīte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hīte: “Paoro nirekari kãkiti apokaerekatini iua.” Ikara na atãoni. ! Ninirekari kãkiti apokaerekatini nota. Ninirekiniãri kãkiti apokaerekatini, kona Kristo nitiri !nitxaikaua.

### *Teoso Akiritari Paoro*

<sup>11</sup> Nanera atão minakati sãpiretakani hīte oereẽkani: “Paoro iokanapirena kona Teoso iokanapirenani,” itxana ninoa sãkire. Nitariakori atãopitikara nisãpiretai hīte. Iokanapirenatxi hītemoni nisãpiretakiti kona kãkiti sãkireni. Teoso sãkirera. <sup>12</sup> Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

<sup>13</sup> Hīte imarotari mitxi nauakasaaki, Xoteo kiomaneakorini oerekakiti nauikasaaki, iusaaki kona nitiretana Xesosi sãkire auiaãkani. Iteene nimisiritana ninoa. Ninirekari nixipokiniri Xesosi sãkire kīpitakani. <sup>14</sup> Iusaaki nimarotari Xoteoakori kitxakapirĩkarini paniãtakiti. Nikamari imakinika ninoa paniãtakiti. Iusaaki nimoianariakori apaka kamari ninoa kitxakapirĩkarini paniãtakiti. Nota apiata

kamari ninoa sãkire iaõka. Iteene ninirekari nikaminiri kitzakapirĩkarini paniãtakiti.

<sup>15</sup> Teoso iteene tiretano nota. Iua mereẽno nota nauini apisapanika. Iuasaaki akiritano nota initiri nininiua tĩkane. <sup>16</sup> Teoso keto manapi apokasaaki, oerekari imi notamoni, imi Xoteo minakonimoni nisãpiretini ĩkapani. Iuasaaki kona nisãpiretari kãkiti Teoso oerekakiti sãkiretxiti, ininiã na kãkitini sãpiretano nikamakiti tĩkane. <sup>17</sup> Iuasaaki kona nisari Xerosareẽ sitatximoni, ininiã nota apisapanika Teoso iokanatakini kona õtãkikano. Kona kãkitimonini nisa noerekiko ĩkapani. Arápia tixinimoni nisapitipo. Eereka nikanapiriã Tamásiko sitatxitimoni.

<sup>18</sup> Ipi anokanani, ãti anokanani pakinikanani napaãka atoko, nisa Xerosareẽmoni Petro nimisãkiretini ĩkapani. Ipi semanati ninapa Petrokata. <sup>19</sup> Apanakini Teoso iokanatakini isãkire sãpiretakani kona naõkita. Api-ananiri itari Txiako inakorinoka naõkita. Ininiãkara kona kãkiti sãkireni nisãpiretai hĩte. Teoso iokanapirenakara nisãpiretai hĩte.

<sup>20</sup> Ia niõkatsopatakiti nisãpiretakiti hĩtemoni atão inakari. Teoso imarotari atão inakari nisãpiretinii.

<sup>21</sup> Xerosareẽmoni nisaãka atoko, nisari Síria tixini, Sirísia tixini apaka. <sup>22</sup> Iuasaaki Kristo sãkire auĩãkani, Xotéia tõpa auakani, !aõkitapanikano nota iuasaaki. <sup>23</sup> Ninoa imarotari apanakini minapiretakiti. Apanakini sãkire: “Kiki mitxi ate misiritakari, uatxa sãpiretari Xesosi sãkire. Mitxi iua nirekari ixipokiniri Xesosi oereẽkiti sãkiretxiti, iuaritika uatxa inirekari oerekiniri Xesosi oerekakiti sãkiretxiti kãkitimoni,” itxana apanakini sãkire. <sup>24</sup> Ininiãkara ninoa: “Peerekari Teoso,” itxana, kotxi nota auikapekari Xesosi sãkire.

## 2

### *Xesosi Iokanatakini Apakaqari Paoro*

<sup>1</sup> Katosi anokanani napaãka atoko, nikanapiriã Xerosareẽmoni nimoianari Panapee inakorikata. Nanikari nimoianari Txito inakori apaka notakata. <sup>2</sup> Xerosareẽmoni nisa, kotxi Teoso oerekano nisini iuamoni. Iuaã napokasaaki, nisãkirauata Xesosi sãkire auĩãkani auĩteakorikata. Ninoakatanoka nisãkirauata. Teoso iokanapirena erekari Xoteo minakonimoni nisãpiretakiti nisãpiretana ninoa. Nota nirekari ninoa imarotiniri nisãpiretakiti atão inini. Apaka ninirekari ninoa imarotiniri iuaĩkana katana nisãpiretakiti atão inini iƙapani. Nisãpiretakiti ikenakotakasaakina, ninoa: “Atãopitikara pisãpiretakiti Xoteo minakonimoni,” itxana. <sup>3</sup> Txito nimoianari na Xoteo !itxaua. Krekora itxaua, ininiãkara Teoso takaõtxikare !auari iuamoni, iuaritika Xesosi sãkire auĩãkani auĩteakori na paniãtari itsiki mata kisauakiko. <sup>4</sup> Mitxi apanakini kikiakori apoka iuaã. Ninoa sãkire: “Ate auikari Xesosi sãkire,” itxana ninoa. Txamari na atão ninoa sãkire. Ninoa apotiitaua Xesosi sãkire auĩãkanikata. Inirekarina Txito iƙtoã Teoso takaõtxikare takiko. Ninoa nirekari imarotinirina kitxakapirĩkarini Xoteo kiomaneakorini paniãtakiti atakanapini, kotxi atakanapapekari ipixini ninoa paniãtakiti, kotxi Kristo Xesosi nakitiakori atxapekautau. Ninoa nirekari imarotiniri ikinika ate oerekakiti sãkiretxiti. Ninoa nirekari ate kaminiri ikinika kitxakapirĩkarini Xoteo kiomaneakorini paniãtakiti. Ninoa nirekari ikinika Xesosi sãkire auĩãkani, Xoteo minakanuia apaka kaminiri Xoteo kiomaneakorini paniãtakiti. Ninoa nirekari nitiritxi amotakoni atoko aniniu. <sup>5</sup> Kona xatiki akamari ninoa nireẽkiti, kotxi inirekarina Teoso iokanapirena atão inakari akoketini

Xoteo kiomaneakorini paniãtakitikata. Ate nirekari Teoso iokanapirena atãonoka inakari asãpiretinii.

<sup>6</sup> Xesosi sãkire auiãkani auĩteakori txari notamoni: “Xoteo minakonimoni pisãpiretakiti erekapitikari. Apikomoni ate sãkire !auari ninoa pisãpiretini ãkapani,” itxana. Ninoa auĩtetxiakori itxauana, iuaritika Teosomoni ninoa apanakini kãkiti poiãorini atokotxikana itxauana, kotxi Teoso atamatari aãkixinire. Ininiãkara nota !nipikari auĩtetxi. <sup>7</sup> Ninoa Xesosi sãkire auiãkani auĩteakori apokaerekatari niparĩka. Ninoa imarotari Teoso sikano nota ia parĩkatxi, ia iokanapirenatxi erekari nisãpiretinina Xoteo minakanuia. Iua atokotxikana Teoso sikari parĩkatxi Petromoni, iokanapirenatxi erekari Xoteoakori isãpiretini ãkapani. <sup>8</sup> Teoso iokanatari Petro Xoteoakorimoni, ininiã isikaposotiiretari iua ninoa sauaki iparĩkauatakasaaki. Iua atokotxikana Teoso iokanatano nota Xoteo minakonimoni. Nota apaka isikaposotiireta ninoa sauaki niparĩkauatakasaaki. <sup>9</sup> Iuasaaki ninoa auĩteakori Txiako, Petro, Xoão pakini imarotari Teoso sikinino notamoni ia parĩkatxi, ininiãkara imaĩkarina niuako, Panapee uako pakini, kotxi akinika aparĩkauata Teoso ãkapani. Akinika aãpokaerekatari nota, Panapee pakini sãpiretiniri Teoso sãkire Xoteo minakonimoni. Akinika aãpokaerekatari Txiako, Petro, Xoão pakini sãpiretiniri Teoso sãkire Xoteoakorimoni. <sup>10</sup> Ninoa paniãtaua ate matxineiroteni atiretini. Iuanoka ipaniãtaua. Napokaerekatari ninoa sãkire, kotxi ninirekapitikari matxineiroteni nitiretini.

### *Paoro Ôtãkikari Petro*

<sup>11</sup> Eereka Petro motikaẽtaua ate ãtxiokia sitatxiti aãuakasaaki. Iuasaaki Petro kamakiti na atãoni. Ininiãkara nota sãkirauata Petro apisatoõ: “Petro, pite kerokari,” nitxari iua. <sup>12</sup> Merepanika Petro nipokota

ikiniõtika aĩtariakori Xoteo minakonikata. Eereka átikaka kikiãkini apoka Txiako iokanatakini. Iusaaki Petro pĩkana ninoa, ininiã kona inikaika aĩtariakori Xoteo minakonikata, Xoteo kiomaneakorini sãkire xika, kotxi ninoa sãkire: “Kãkiti Teoso takaõtxikare iĩtoã mauakaniã, !pinipokotape ninoakata,” itxana ninoa sãkire. Petro pĩkana Txiako iokanatakini, kotxi ninoa nirekari Teoso takaõtxikare auini aĩtariakori iĩtoã, Xoteo minakaniua iĩtoã. <sup>13</sup> Apanakini Xoteoakori Xesosi sãkire auiãkani apaka kamari Petro kamakiti atokokana, ininiã ninoa apaka kerokari. !Inipokotaikana aĩtariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aĩtariakorikata, Xoteo minakonikata. <sup>14</sup> Nimarotakasaakiri ninoa kerokiniri ikamakitina, nota misãkiretari Petro ikinimane õkiãtaã, kotxi ninoa !ikamari atão inakari. Teoso iokanapirena erekari iaõka !ikamana. Nitxari iua: “Xoteokarai, iuaritika pauanãta Xoteo minakaniua sauaki, ininiã Xoteo kamakiti atoko !pikamaika. Xoteo minakaniua atoko pitxaua. Ininiãkara kinirepa pite paniãtana Xoteo minakaniua: ‘Hikĩpitariko Xoteo kiomaneakorini sãkire?’ !Erekari,” nitxa Petromoni.

### *Xesosi Sãkire Auikiko Kamaerekatari Kãkiti*

<sup>15</sup> Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakaniua maerekati kamakani itxauana,” itxana isãkirena. Xoteo minakaniua !atxaua ate. <sup>16</sup> Aimarotari, aãuikiniãri Xesosi Kristo sãkire, iua kamaerekatari aãkixinire, ininiãkara Teoso apakapaua. Kitxakapirika Teoso sãpiretari Moisesi ipaniãtakiti kãkiti kamini tĩkane. Ininiãkara Moisesi iõkatsopatarari ikara Teoso sãkire. Txamari !aposotari akaminiri imakinika Teoso paniãtakiti, Moisesi iõkatsopatakiti, ininiãkara !ikamaerekatari aãkixinire. !Apakapaua ate. Ate auikari Xesosi

sākire ereka anini ĩkapani, ininiā Teoso apakapapitikaua ate. Teoso paniātakiti iōkatsopatakori ikinika ! aposota akamini, ininiā Xesosi kamaerekatari aākixinire Teoso apakapiniua ĩkapani, Kristo sākire aāuikasaaki. <sup>17</sup> Anirekasaakiri Teoso kamaerekatinina, aāpoka Kristomoni. Iuasaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ĩkapani. Ikara atoko ininiā, atxiīti Kristo nirekatari maerekati akamini, imakatxakiniri ĩkapani? Konapitini. <sup>18</sup> Atxiīti kākiti imarotari Xoteo kiomaneakorini paniātakiti kamiko na kamaerekatari kākiti ākixinire, ininiā itakanapari ninoa paniātakiti ikamini. Atxiīti āti ōti iuaĩkana ikamari ninoa Xoteo kiomaneakorini paniātakiti iaōka, ininiā iuasaakiikarako ikerokari. <sup>19</sup> Moisesi iōkatsopatakiti oerekano nota ipĩkari atoko nininiua, kotxi nota kona posotari ikinika Moisesi iōkatsopatakiti iaōka nikamini, ininiā nimisiritiko auapitikako. Ininiā nimarotari Moisesi iōkatsopatakiti kona makatxakari nimaerekani. Ininiā nimarotari Xesosi sākire auĩkari-nokara auapininiika. Ininiā uatxa ikiniōtika ninirekari Teoso nireēkitinoka nikamini. <sup>20</sup> Xesosi okaāka aamina ĩpiriāmitakari nopini. Aamina ĩpiriāmitakari nopini okakori atoko nitxaua, kotxi maerekati mitxi nikamakiti !ninirekaikari nikaminiri. Mitxi ninireēkiti kona auaika. Iuaritika auākipanika nitxaua, kotxi Kristo aua nākixinireē. Teoso ākiri sākire nauikiniā, auākipanika nitxa. Iua taretano nota. Iua ipĩpe nota ĩkapani. <sup>21</sup> Moisesi iōkatsopatakiti kamiko kamaerekatiniāua ate, kinirepa Xesosi ipina? Moisesi iōkatsopatakiti kamiko na xatiki kamaerekataua ate. Teoso tiraōkinokara kamaerekatari aākixinire.

### 3

*Natokopa Itxa Teoso Kamaerekatiniua?*

<sup>1</sup> Hīte Karásia tixini auakanii kona kiikitei hīte. Kipa misirienetai hīte atão inakari himakamakani ĩkapani? Kotxi himarotapitikari atão inakari. Himarotari Xesosi Kristo ipina aamina ĩpiriãmitakari nopini amaerekani imakatsakani ĩkapani. Ate oerekapekai ikara atão inini. <sup>2</sup> Ianoka nipimaãi hīte: Kisaakipa hãpakapari Erekaru Matamatakoti? Hãpakapatari iua, Moisesi paniãtakiti hĩkamakasaaki? Konapitini. Hãpakapatari Erekaru Matamatakoti Teoso iokanapirena erekari hãuikasaaki? Ari, Teoso iokanapirena erekari hãuikasaaki, iusaakiikara hãpakapari iua Erekaru Matamatakoti. <sup>3</sup> Kipa iomaĩkitetai hīte? Merepanika Teoso sikari Erekaru Matamatakoti hĩtemoni, ininiã Erekaru Matamatakoti sikaposotiiretai hīte Teoso paniãtakiti hĩkamini ĩkapani. Uatxa hĩxinikataru Teoso paniãtakiti hĩkamini hĩteka posotiireẽkani? Konapitini. Kona hīte posotari. <sup>4</sup> Himisiritapeẽkaika Xesosi sãkire hãuikini xika. Kinirepa himĩteenekataru himisir-itiko? Atauako uatxa kona hãuikaikari mitxi hãuikakiti Xesosi sãkire? <sup>5</sup> Kirisaakipa Teoso sikari Erekaru Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekaru Matamatakoti, oerekai iposotiire, Teoso iokanapirena hãuikasaaki.

<sup>6</sup> Hĩxinikariko Apraõoni. Apraõo auikari Teoso sãkire, ininiãkara Teoso kamaerekataru iua, ininiã Teoso apakapari iua. <sup>7</sup> Ininiã ninirekaru himarotiniri, kãkiti Teoso sãkire auiãkani Apraõo apika mekaniriakori atão inakani itxauana ninoa. <sup>8</sup> Teoso kamaerekataru Xoteo minakanua, kotxi ninoa auikari Xesosi sãkire. Kitxakapirika Teoso sãkire iõkatsopatakori sãpiretapekaru ikara Teoso iokanapirena erekari Apraõomoni. Ikara iõkatsopari txari: “Nota sikariko erekari ikinimane kãkitimoni, kotxi pite Apraõo auikari nota sãkire.” <sup>9</sup> Apraõo kĩpitari Teoso



sãkire, ininiãkara Teoso takari erekari iuamoni. Iua atokotxikana Teoso takari erekari iua sãkire kîpitakani-moni.

<sup>10</sup> Apanakini uãkatari Teoso apakapinina ninoa, kotxi ikîpitarina Moisesini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi paniãtakiti ikiniõtika imakamakanisaaki.” <sup>11</sup> Teoso sãkire iõkatsopatakori txari: “Teoso kamaerekatariko kãkiti, iua sãkire auiãkani. Ininiã isãkire auiãkani auapininiika itxako Teosokata,” itxa Teoso sãkire iõkatsopatakori. Ininiãkara aimarotari Moisesi paniãtakiti kîpitiko kona kamaerekatari kãkiti. <sup>12</sup> Moisesini iõkatsopatakiti kona paniãtaua aãuikiniri Xesosi ipinini amaerekani imakatzakini îkapani. Moisesi iõkatsopatakiti paniãtaua akaminiri ikinika Teoso paniãtakiti. Teoso sãkire iõkatsopatakori txari: “Kãkiti, Teoso paniãtakiti iõkatsopatakori ikinika makerokakatirako auapininiika itxako Teosokata,” itxa Teoso sãkire iõkatsopatakori.

<sup>13</sup> Txamari ãtika Teoso paniãtakiti Moisesi iõkatsopatakiti akerokiniã, amisiritaãkako. Kristo makatzakaua ate ikara misirikaretxi monõkori, kotxi Teoso misiritari Xesosi Kristo aamina îpiriãmitakari nopini ate maerekani xika ate mapinakani îkapani. Teoso sãkire iõkatsopatakori txari:

Kãkiti aamina nopini okakori Teoso misiritakiti itxaua.

<sup>14</sup> Teoso sikaenetari erekari Apraõomoni. Kristo ipipe hîte Xoteo minakaniuua ikara erekari hãpakapini îkapani. Ininiã Xesosi Kristo sãkire aãuikasaaki, aãpakapari mitxi Teoso sikaenetakiti. Aãpakapari aãkixinireẽ Erekari Matamatakoti, Teoso sikaenetakiti atemoni.

*Teoso Sikaenetakiti Sãkiretxiti*

<sup>15</sup> Nitariakori, ikinimane kãkiti imarotakiti nisãpiretaiko hĩte, noereẽkiti sãkiretxiti iteene himarotini ìkapani. Ipi kãkiti aua itiina isikaenetakakana. Iuasaaki, iõkatarina iuãkana isikaenetakitina tsopaã. Eereka !auritaãkana imaxinĩkaretinirina isikaenetakitina. Apaka !auritaãka sãkiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. <sup>16</sup> Himarotariko ia. Teoso sikaenetari erekari Apraãomoni, Apraão apika mekanirimoni apaka. Teoso sãkire iõkatsopatakori na txari: “Apika mekaniriakori.” Teoso sãkire iõkatsopatakori txari: “Apika mekaniri.” Ininiã ãtika apika mekaniri. Kristo itxaua iua. <sup>17</sup> Ia ninireka nisãpiretinii. Kitxakapirĩka Teoso sikaenetakiti Apraãomoni apokapeka. Koatrosẽtosi trĩta pakini anokanani Apraão auaka atoko, Teoso sãpiretari Moisesi ipaniãtakiti iõkatsopatini ìkapani kãkiti kamini ìkapani. Moisesi iõkatsopatakiti kona xipokari Teoso sikaenetakiti Apraãomonikari. <sup>18</sup> Teoso sikari Kristo kãkitimoni, kotxi mitxi isãpiretari isikaenetakiti Apraãomoni. Teoso sikasaakiri ipaniãtakiti sãkiretxiti Moisesimoni ikara iaõka kãkiti kamini ìkapani, isikaenetakiti auapeka iuasaaki. Ipaniãtakiti sikiko !ixipokari isikaenetakiti.

<sup>19</sup> Ininiãkara kininiãpa Teoso sikari ipaniãtakiti Moisesimoni kãkiti kamini ìkapani? Teoso paniãtakiti iõkatsopatakori oerekaua maerekati kamakaniua ate, kotxi !aposotari ikinika ipaniãtakiti akamini. Kristo, Apraão apika mekaniri ìkorapokoriti apokini apisapanika, Moisesi iõkatsopatakiti oerekaua Teoso nireẽkiti akamini ìkapani. Teoso sikaenetakiti itxaua Xesosi Kristo. Teoso sikasaakiri ipaniãtakiti sãkiretxiti Moisesimoni, Teoso nitiriakori aua iuaãtaã. Teoso sãpiretari isãkire Moisesimoni. Eereka Moisesi sãpiretari kãkiti. <sup>20</sup> Teoso sãpiretakasaakiri Apraão isikaenetakiti, !ipaniãtari ãti kãkiti

sãpiretiniri Apraão. Teosonokara sãpiretari Apraão.

*Moisesi iõkatsopatakiti*

<sup>21</sup> Moisesi iõkatsopatakiti aãuikiniã, atxiiti ! anirekaikari Teoso sikaenetakiti? Anirekapitikari. Akiomaneakorini paniãtakiti sãkiretxiti, kona txikitakaua aãuapininiika anini tĩkane. Ininiãkara akiomaneakorini sãkire kona kamaerekataua ate, ininiã Teoso kona apakapaua ate, ininiãkara kona aãuapininiika ! atxa Teosokata. ! Auari mauritakoti sãkiretxiti kãkiti auapininiika inini txikitakakari. <sup>22</sup> Teoso sãkire iõkatsopatakori txari: “Ikininape kãkiti kamari maerekati.” Kateia ãki auakani atoko atxaua, kotxi ! aposotari erekari akamini. Teoso sikaenetakiti sikaãka Xesosi Kristo sãkire auiãkanimoni.

<sup>23</sup> Xesosi Kristo sãkire auikiko apisa, kãkiti kateia ãki auakani atokokana itxauana. Kãkiti moiaãkari atoko itxaua Teoso paniãtakiti Moisesimoni sikakori. ! Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ãkorapokoriti. Ipinapeka kãkiti ãkapani, ininiã uatxa aãuikiniãri iua sãkire, kona Teoso misiritaikaua uatxa. <sup>24</sup> Kristo mapokakani apisa, ate oerekakari atoko itxaua Teoso paniãtakiti iõkatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aãuikari Kristo sãkire. <sup>25</sup> Uatxa apokapeka Xesosi Kristo sãkire auikiko. Ininiãkara Teoso paniãtakiti iõkatsopatakori limoiaãikaua ate.

<sup>26</sup> Teoso anaakori hĩtxaua, kotxi hãuikari Kristo Xesosi sãkire. <sup>27</sup> Hĩte patxisatapeẽkaika, ininiãkara hĩpatxisatiko oerekari apanakini Kristo ãtipirika himoianatini ãkapani. Ininiãkara Kristo atokopeka hĩtxa. <sup>28</sup> Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakaniua, nitiritxi, nitiritxi minakaniua, kiki, sito, amakinika Kristo nakiti atxaua.

<sup>29</sup> Kristo nakiti pininiãua, Apraão apika mekaniri pitxaua apaka. Ininiã pite apakapapitikariko Teoso sikaenetakiti.

## 4

### *Teoso Anaakori*

<sup>1</sup> Apikomoni nisãpiretaiko hïte ãti sãkiretxiti. Amarini lapakapari irini tii itakanapakiti iua ïkapani, kotxi xapitipantikari. Ikinipoko irini nakiti imi nakiti txapekaua, iuaritika na apakapapanikari. Axapitipanika inakasaaki, nitiritxi atoko itxaua. <sup>2</sup> Axapitipanika inakasaaki apanakini moiaãri iua. Ninoa nïkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. <sup>3</sup> Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniãtakiti sãkiretxiti amoiaãkiri atoko itxaua, kotxi oerekaua akamakiti tïkane. <sup>4</sup> Teoso iokanatarari imi kãkitimoni iketo manapisaaki. Sito ïto ãki aua merepanika, ikinimane kãkiti atoko. Iua kïpitari ikinika Teoso paniãtakiti iõkatsopatakori. <sup>5</sup> Amakamakaniãri ikinika Teoso paniãtakiti iõkatsopatakori, amisiritiko auapitika. Xesosi makatxakaua ate amamisiritakoni ïkapani. Ininiã Teoso anaakori atxaua.

<sup>6</sup> Teoso anaakori aniniãua, Teoso iokanatarari Erekari Matamatakoti imi nakiti aãkixiniremoni. Ininiã iua Erekari Matamatakoti aãkixinireë auiniã, aãkiritari Teoso: “Papai, niri,” atxariko. <sup>7</sup> Ininiã nitiritxi atoko !atxaikaua. Teoso anaakori atxapekaua. Iua anaakori aniniãua, ikini isikaenetakiti isikaua atemonikari, kotxi Kristo makatxakapekari amaerekani.

### *!Erekaxinireri Paoro Karásia Auakani Xika*

<sup>8</sup> Mitxi hïte !imarotari Teoso. Iusaaki nitiritxiakori amotakoni atoko hïtxaua. Hïparïkauata teoso minakaniua ïkapani. <sup>9</sup> Uatxa hïte imarotari Teoso. Ari, uatxa Teoso imarotai hïte. Ininiã kinirepa hïte nirekari hïkanapiriini

mitxi h̄auĩteakorimoni. Kona kaposotiirena ninoa. ! Kiĩkitena ninoa. Kinirepa h̄ite nirekari uuaĩkana ninoa nitiriakori amotakoni atoko hininiãua? Kinirepa h̄ite nirekatari uuaĩkana h̄auikiniri ninoa oereẽkiti s̄akiretxiti? <sup>10</sup> H̄ite nirekari Xoteo kamakiti atoko inakari h̄ikamini. H̄iũakatari Teoso apokaerekatini h̄ite, kotxi ninoa kinirite atokotxikana h̄ite apaka kama. <sup>11</sup> Ininiã !erekaxinireno nota ikara nikenakoenetini. Atauako maxikatĩika nota s̄apiretari Teoso s̄akire h̄itemoni?

<sup>12</sup> Nitiriakori, nota iteene õtãkikai h̄ite. H̄itakana-pariko Xoteo kiomanearorini paniãtakiti h̄ikamini. Nota atoko h̄itxako, kotxi h̄ite sauaki nauakasaaki nota h̄ite atoko nitxaua. Xoteo minakaniua atoko nitxaua. H̄itekata nauakasaaki, ! himisiritano nota. H̄itiretano nota. <sup>13</sup> H̄ixinikari merepitipanika Teoso iokanapirena erekari h̄ite nisãpiretakasaaki, namianare xikara nisãpiretai h̄ite, h̄itekata nauakasaaki. <sup>14</sup> Iuasaaki namianatakasaaki, h̄iparĩkauatapitipo nota ĩkapani. ! Hinaiakakano. ! H̄iokanatanano nisini namianare xika. H̄ite apakapano nota Teoso nitiri iaxitikiri h̄ãpakapini atokokana. H̄ite apakapano nota, Kristo Xesosi h̄ãpakapini atokokana. <sup>15</sup> Iuasaaki h̄ite iteene h̄ĩpoxokoniuata. Nimarotari ereka hinini, kotxi noki amianatakasaaki, h̄ĩposotaãkamariko, himakatxakamariko h̄iteka oki notamoni h̄isikini ĩkapani. <sup>16</sup> Atauako uatxa himokaiakari nitxataua nota, atão inakari nisãpiretinii xika?

<sup>17</sup> Ninoa kamisirienererini iteene tiretapitikamai h̄ite, txamari ninoa ãkixinire nireẽkiti !erekari h̄ite ĩkapani. Inirekarina h̄ite omanatiniua ate. Inirekarina h̄ite apokaerekatini ninoanoka. <sup>18</sup> Erekari kãkiti iteene tiretinii h̄ite, ãkixinire inireẽkiti erekari inakasaaki. Nota h̄itekata nimauakanisaaki apaka, erekari kãkiti iteene tiretinii, ãkixinire inireẽkiti erekari inakasaaki. <sup>19</sup> H̄ite namariteni nota tiretakini atoko h̄itxa. Hinoro atokotxikana nitxa nota. Kaiamapeka auaenetakaro atoko nitxa, kotxi

nota atatsiirauata hĩte xika. Kristo kamakiti atokotxikana hĩkamakasaaki, iusaakinoka nitsii nãkixinire auakari iotoka. <sup>20</sup> Kinirão auaka nitxa hĩtekata uatxa. Ninirekari aãpisatoõtakakiniua, ininiã nixinikakiti ipinimonipo itxa atxiĩti. !Erekaxinireno nota hĩte xika.

### *Akaa, Sara Pakini*

<sup>21</sup> Hĩte Xoteo kiomaneakorini paniãtakiti nireẽkani, himarotatari ninoa sãkire? <sup>22</sup> Teoso sãkire iõkatsopatakori sãpiretaua, ipi Apraão anaakori aua. Sito niterotxi iamotakitokata aua imi ãti. Niterotxi minakotokata ãtanorokata aua ãti imi. <sup>23</sup> Akaa inakoromoni, niterotxi iamotakitomoni imi aua, kotxi Apraão sirika oakata. Imi aua Saramoni niterotxi minakotomoni, kotxi Teoso sikaenetari iua imi. <sup>24</sup> Apraão anaakori oerekaua Teoso parika kãkiti ãkapani. Iparika ipi aua, naia sito ipi atoko. Akaa inakoro ãkiri nitiritxi amotakori itxaua. Teoso parika õtanoxiratari Sinai inakori iua auakasaaki, niterotxi Akaa atoko itxa. Teoso paniãtakiti iusaaki amakamakaniã, amisiritiko auapitikako, nitiritxi amotakori atokotxikana. Nitiritxi makamakaniãri ipatrãote paniãtakiti imisiritiko auapitikako. <sup>25</sup> Ininiãkara õtanoxiratari Sinai inakori Arãpia tixini auakari Akaa atoko itxa. Apaka ãkorasaaki Xerosareẽ sitatxiti oa atokokana itxa, kotxi Xerosareẽ auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareẽ auakani !ikamari ikinika Teoso paniãtakiti, ininiã Teoso misiritapitikanako ninoa. <sup>26</sup> ãti Xerosareẽ auapitika, iaxiti auakari Xerosareẽ, Teoso tixine. Xerosareẽ iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ãkiri atoko atxaua, kotxi amisiritiko !auaika. Aãuikiniãri Xesosĩ sãkire, akiomaneakorini kona paniãtaikaua ate ninoa nireẽkiti akamini. <sup>27</sup> Teoso sãkire iõkatsopatakori txari:

Pite sito meenetoí pipoxokoniuatako. Pite sito pauāk-itakarauatini tsii mimarotakatoí, pixikarauata pipoxokoniritika, kotxi pite takanapakoroí, itori pamariteakori auako. Kītaniriro poiāoka oamariteakori auako, itxa Teoso sākire iōkatsopatakori.

<sup>28</sup> Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraão imi Saramoni auini. Iuatxikana Teoso sikaenetaua Xesosi amaerekani imaktxakini ĩkapani, Teoso anaakori aniniua ĩkapani.

<sup>29</sup> Akaa ākiri Isimaeo inakori iponaniā, kotxi Apraão nirekari imi, ininiā iua sirīka Akaakata. Sara ākiri Isaki inakori iponaniā Erekarī Matamatakoti posotiireē. Eereka Isimaeo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. <sup>30</sup> Teoso sākire iōkatsopatakori txari:

Hīokanataroko niterotxi iamotakoro osipinini imikata, kotxi niterotxi ākiri kona apakapapaniri ipixini iri tii. Niterotxi minakoto ākirinoka apakapari iri tii, itxa Teoso sākire iōkatsopatakori. <sup>31</sup> Ininiā nitariakori, niterotxi amotakoro ākiri atoko !atxaua. Niterotxi minakoto ākiri atoko atxaua.

## 5

### *Takaōtxikari !Ikamaerekatari Kākiti*

<sup>1</sup> Nitiritxi kamari ipatrāote nireēkitinani. Ikara atoko uatxa !atxaika, kotxi aāuikari Kristo sākire. Kristo makatxakapekaua amisiritiko monōkoni. Ininiākara nitiritxi amotakoni atoko iuaĭkana !hīt xapeua. !Hāuiritapiri kākiti paniātini ninoa auiākiti hāuikini.

<sup>2</sup> Hīkenakotako. Nota Paoro sāpiretaiko hīte. Hāuiritiniāri takaōtxikari takiko hītoā Xoteo atoko, ininiā hāuikari takaōtxikari kamaerekatini hīte Teoso apakapini ĩkapani. Txamari na atāo. Kristonoka kamaerekatari kākiti Teoso apakapini ĩkapani. Erepaniko,

pinirekiniári takaõtxikari, ! pinirekaikari Kristo.  
<sup>3</sup> Iuaíkana nota õtãkikai hïte. Hãuiritiniári takaõtxikari takiko hïtoã Xoteo atoko, ininiã Moisesi paniãtakiti ipixini hïkamapeka. Ikara atoko hininiã, ikinika ipaniãtakiti hïkamako. <sup>4</sup> Åtikaka hïte nirekari Moisesi paniãtakiti hïkamini Teoso kamaerekatini ikapani. Txamari ikara atoko hinirekiniã, hïtakanapari Kristo. Ininiãkara Teoso ! iposotari ikinipoko erekari isikinii. <sup>5</sup> Atepekana, ate auikari Xesosinoka txïkitakiniri kãkiti ereka inini ikapani, Teoso apakapapini ikapani. Ikamaerekataua Erekari Matamatakoti posotiireẽ, kotxi aãuikari Xesosi sãkire. <sup>6</sup> Takaõtxikari hïtoã auiniã, iua takaõtxikari ! ikamaerekatai hïte. Takaõtxikari hïtoã mauakaniã, takaõtxikari mauakani ! ikamaerekatai apaka. Kristo Xesosi nakitiakori aniniãua, Teosora kamaerekataua, kotxi aãuikari Xesosi sãkire, ininiã atiretari iua.

<sup>7</sup> Merepanika hïte auikapitikari Xesosi sãkire. Kipa xipokatarari atão inakari Teoso sãkire hãuikini? Natokopa itxa Teoso sãkire atão inakari hïtakanapini? <sup>8</sup> Hïte akiritakari itxaua Teoso. Kona iuani xipokari hãuikiniri atão inakari isãkire. <sup>9</sup> Kãkiti sãkire txari: “Pão åtikaãkari axapitiri ipani, iuaritika iãtikakakiti itori ipe.” Iua atokokana åtika maerekati kamakari xika kaiãopokori kãkiti kamari maerekati. <sup>10</sup> Teoso kamaimaroretano nota hïte takanapiniri hïkerokakiti, atão inakari hïkamini ikapani. Hïte nitariakori hïtxaua, kotxi Apiananiri nakitiakori atxaua, ininiãrako nimarotari nota õtãkikinii iaõka hïkama-panikako. ! Nimarotari iua kiki himisirienetakiri. Ia nimarota. Teoso misiritapanikariko iua.

<sup>11</sup> Apanakini sãpirenãtari: “Paoro paniãtari Xoteo minakaniua takiniri takaõtxikari iïtoãna.” Na atão ninoa sãkire. Nipaniãtaãkamariko takaõtxikari takiko, nimisir-itiko ! auamako. Kona nipaniãtari Xoteo minakaniua



takiniri takaõtxikari iïtoãna. Ikara xika nimisiritaãka. Nisãpiretari ia: Kristo aamina ïpiriãmitakari nopini ipïpe amaerekani imakatzakini ïkapani. Kristonoka kamaerekataua Teoso apakapiniua ïkapani. Ikara no-erekakiti xika nimisiritaãka. <sup>12</sup> Ninoa kamisirienererini nirekiniãri itsiki mata kisauakiko, erekari itsikipati tso-tatiko apaka. Nomanãkarauata, ninoa misirienetini xika.

<sup>13</sup> Nitariakori, Teoso akiritai hïte iua nakitiakori hininiua ïkapani, ininiãkara uatxa hïposotari hïteka nireëkiti hïkamini. Iuaritika !hïkamapiri maerekati hïto nireëkiti. Ia hïkamako: Hïtiretakakauako ãtipirika. Ikara atoko hininiã, himoianatakakauako. <sup>14</sup> Teoso paniã-takiti txari: “Pitiretana apanakini piteka pitiretiniua atokokana.” Ikara paniãretxi pikaminiã, pikamapekari ikinika Moisesi paniãtakiti. <sup>15</sup> Kaxipiri ïtopa auakani atoko !hïtxape. Ninoa karotakakaua, okakakaua itxana. Erepaniko. Kaxipiri ïtopa auakani atoko hininiã, hïx-ipokakauako.

### *Aïto Nireëkiti*

<sup>16</sup> Nõtãkikare ia atoko itxapaniko: Hãuiritariko Erekar Matamatakoti oerekinii iua kimapore ikiniõtika. Iua hïkimapore oereëkari ininiãua, !hïkamapiri maerekati hïto nireëkiti. <sup>17</sup> Aïto !inirekari Erekar Matamatakoti nireëkiti. Iuatxikana Erekar Matamatakoti !inirekari hïto nireëkiti. Erekar Matamatakoti mokaiakari itxaua aïto. Ininiã aãkixinire nireëkiti !aposota akamini aïto nireëkiti xika. <sup>18</sup> Iua Erekar Matamatakoti oerekiniãi pikimapore ikiniõtika, pikaminiãri iua nireëkiti, ininiã Xoteo kiomaneakorini paniãtakiti !oerekaikari pikimapore.

<sup>19</sup> Aimarotapitikari kãkiti ïto nireëkiti. Inirekari ïtanir-itxi minakotikatika osirïkini, ïtanorotxi minakotokatika isirïkini, mitxitakari ãtokata isirïkini. Kãkiti ito nirekari

kākiti xinikaxititini maerekati iito nireēkiti. Kākiti iito nirekari āti kākiti iito, maerekati ikaminina ikapani. <sup>20</sup> Kākiti iito nirekari teoso kākiti kamakiti iteosone ikapani. Kākiti iito nirekari maerekani matamatakoni paniātakiti ikamini. Kākiti iito nirekari omanākaretxi, neenamati, xikoretxi, norikaretxi, iukaretxi. Kākiti iito nirekari kākiti omanatiniri apanakini. <sup>21</sup> Kākiti iito nirekari āti kākiti tii. Inirekari okanitxi, poātakatxi, maerekati kiiniriti ikamini. Ikara atoko inakari maerekati kākiti iito nireēkiti. Uatxa nipinitai hīte, mitxi nipinitinii atokotxikana. Ikara maerekati kamakani !auapani Teoso auīteti ininiātaāua.

### *Erekari Matamatakoti Nireēkiti*

<sup>22</sup> Iua Erekari Matamatakoti aākixinireē auiniā, !ikara atokoni itxa akamakiti. Iua Erekari Matamatakoti aākixinireē auiniā, atiraōkiuata. Apoxokoniuata. Erekaxinireua. !Katimari aomanākarauatini. Aamonīkarauata. Erekaua. Akamaenetakiti akamapitika. <sup>23</sup> Ate !iukaua. !Akamari maerekati aīto nireēkiti. Ikara atoko atxa, Erekari Matamatakoti aākixinireē auiniāua. Ikara atoko aniniā, amisiritiko !aui. <sup>24</sup> Kristo nakitiakori aniniāua, !anirekaikari akaminiri maerekati aīto potxitakiti, aīto nireēkiti. Amanirekakiniti aōkini atokokana, aōkapekari maerekati aīto nireēkiti. <sup>25</sup> Erekari Matamatakoti txīkitakari axinire auāki inini, ininiākara makamari ikinipoko iua nireēkiti ikiniōtika. <sup>26</sup> !Apakata aūikiniua. !Apakata aneenamauatini. !Apakata axikotakakiniua.

## 6

### *Himoianatakakiniua*

<sup>1</sup> Nitariakori, hīte Erekari Matamatakoti nireēkiti kamakanii, himarotakasaakiri aītari kaminiri maerekati, hōtākikariko iua imaerekani itakanapini ikapani. Hōtākikariko hītiraōkiritika. Iuasaaki erepaniko, kotxi atxiīti hīte apaka nirekari iua maerekani atokotxikana

hīkamini. <sup>2</sup> Himoianatakakauako hītapara poiāonoka inakasaaki. Ikara atoko hininiā, hīkamari Kristo paniātakiti apanakini hītiretini. <sup>3</sup> !Erekari ate iuikiniua. Kākiti minakati: “Apiari nota,” inakari, iuanika misirienetaua. <sup>4</sup> Erekari nataerekatiniri notaka kamakiti. Erekari atxiīti? Nikamakiti ereka ininiā, nipoxokoniua. ! Apakata nākixinireē nixinikiniri: “Iua āti kamakiti apiaerekata. Nota kamakiti poiāo erekari.” !Apakata ikara atoko ninini. <sup>5</sup> Ikininape kākiti aua iparīka kasāpaniri. Iuanoka posotari ikaminiri.

<sup>6</sup> Teoso sākire oereēkari oerekiniāi pite Teoso sākire, iusaaki minakati auiniāi pisikari iuamoni. Nipokori atxiīti, txineiro atxiīti, pisika iuamoni, kotxi iua kikiote ! auari. <sup>7</sup> Piteka ! pimisirienetapeuako, kotxi ! piposotari Teoso pimisirienetini. Teoso misirienetakari ! auari. Pikikioteē mitxi pitakakiti iaōka papakapa. Iua atokokana pikamakiti ereka inini, papakapari erekari. Pikamakiti maerekati inini, papakapari maerekati. <sup>8</sup> Piīto nireēkiti pikaminiā, papakapari piīto siākitinoka. Piīto sikai ipīkitxinoka. Teoso misiritapitikai. Erekari Mata-matakoti nireēkiti pikaminiā, papakapari iua siākiti. Iua siākiti Teosokata ātipirika pauini īkapani. <sup>9</sup> ! Apakata asāpakini erekari ikiniōtika akamini. Makamari erekari ikiniōtika, maiotokakanikaua anini. Erekari akamini amaiotokakaniā, erekari Teoso sikakiti aāpakapini apokapitikako. <sup>10</sup> Ininiā aposotakasaakiri, makamari erekari ikininapemoni. Merepanika makamari erekari aītariakorimoni Xesosi sākire auiākanimoni.

### *Imapotōkire Ōtākikaretxi*

<sup>11</sup> Hātamariko ia niōkatsopare mitari. Ia iōkatsopari imapotōkire nota niuakoā niōkatsopatakiti. <sup>12</sup> Apanakini hīte sauaki nirekari ninoaka apokaerekatiko, ininiā isāpiretari kākiti potxitakitinoka. Ninoakara paniātai

hítakiniri takaõtxikari hĩtoã. Kininiãpa ninoa nirekatari takaõtxikari hĩtakini? Ninoa misiritiko monõkoni xika, ninoa paniãtari Xoteo minakaniua takiniri takaõtxikari iĩtoãna, ininiã Xoteoakori potxitari ninoa oereẽkiti sãkiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kãkiti, kotxi ipĩpe aamina ipiriãmitakari nopini kãkiti maerekani imakatzakini ikapani. <sup>13</sup> Ninoa kamisirienererini kamari Moisesi paniãtakiti takaõtxikari itakinina iĩtoãna. Txamari ikinika Moisesi paniãtakiti !ikamana. Ninoa nirekari hĩte takiniri takaõtxikari hĩtoã, ininiã eereka ninoa iuikaua, kotxi hĩte kamari ninoa paniãtakiti. <sup>14</sup> Kona ninirekari niuikiniua. Teoso !inirekari niuikiniua. Nota iuikari aũũte Xesosi Kristo. Iuanokara niuika, kotxi iua ipina aamina ipiriãmitakari nopini ate ikapani. Ininiã nota !ninirekaikari Xesosi sãkire mauĩãkani nireẽkiti. Iuatxikana ninoa !inirekari nota nireẽkiti. <sup>15</sup> Takaõtxikari hĩtoã auiniã, iua takaõtxikari !ikamaerekatai hĩte. Takaõtxikari hĩtoã mauakaniã, takaõtxikari mauakani !ikamaerekatai. Teoso txĩkitakiniãi iua anaakori hininiãua, iusaaki ikamaerekatai hĩte. Ininiãkara hãkixinire amaneri itxaua. Ininiã mitxi hinireẽkiti !hinirekaika. <sup>16</sup> Teoso kamaerekaxiniretai hĩte, ikara sãkiretxiti hãuikasaaki. Iua amonĩkai hĩte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

<sup>17</sup> Ixipope ia iõkatsopari. Nipinitana nota kamamaxiretakani. !Hĩkamamaxiretapeno, kotxi nimisiritaãkapeka. Nikaro mata auapeka niĩtoã. Auĩtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

<sup>18</sup> Nitariakori, aũũte Xesosi Kristo sikari ikinipoko erekari hĩte ãkixiniremoni. Ameẽ.

## **Teoso sãkire ameneri New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Apurinã

**© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 19 Oct 2021 from source files dated 19 Oct 2021

253eaec7-f0c7-5b49-b6be-65ee5354d0ed